


**CON PA SIÑA
BO YIU
PA TA AMABEL**



Un traduccion y adaptacion di:

"About teaching your child kindness"

*A scriptographic booklet
by Channing L. Bete Co. Inc.*

Reproduci pa:



Tel.: 5824433

Co-financia pa:



KICO KIER MEEN AMABILIDAD?

Amabilidad kier meen trata otro amabel y cu respet.

AMABILIDAD TA UN BALOR POSITIVO

cu mayoría di mayor kier pa nan yiu tin.



UN MAYOR POR HACI HOPI PA YUDA LANTA UN YIU CU TA AMABEL.

Contra cu abo ta e ehempel principal di bo yiu. Bo palabra y actonan ta yuda bo yiu comprende e balor di ta amabel.

AMABILIDAD POR YUDA BO YIU AWE Y MAÑAN

Un mucha amabel ta mas liher:



CONTENTO CU SU MES

Ora bo yiu tin un bon imagen di su mes, esaki ta yud'e mira mas leu cu su propio necesidad y deseo. Un mucha amabel por mira con su comportacion ta influencia otro hende.

GUSTA PA OTRO

Un mucha cu ta trata otro cu respet y compasion:

- Ta mas agradabel pa ta den su compania
- Ta cera amistad mas facil.

Un mucha amabel ta contento cu logro y alegria di otro, mescos cu esunnan di dje.

AMABILIDAD TA CRECE DEN UN AMBIENTE UNDA TIN HOPI AMOR

Algun manera pa yuda bo yiu desaroya amabilidad:

MUESTRA BO AMOR

Smile y braza otro hopi. Lantando den un hogar yena cu amor, ta yuda bo yiu siña con pa mostra cariño y afecto pa otro.



ELOGIA BO YIU

Sea specifico! Por ehempel, bisa: "Tabata amabel di bo pa yuda bo ruman cu su les" na lugar di bisa: "Danki pa yuda." Duna elogio ta motiva bo yiu pa ripiti e comportacion cu bo ta desea.

PASA TEMPO CU BO YIU

Laga bo yiu sa cu e ta importante. Pasa por lo menos 15 of 20 minuut bo so cu bo yiu tur dia. Haci algo cu e ta gusta.



SCUCHA CU ATENCION

Pone atencion na locual bo yiu ta bisa. No pura, ni interumpi. Haci'e pregunta pa must'e cu di berdad bo a scuch'e. Bo ehempel por yuda bo yiu siña bira un bon scuchado.



DUNA RESPONSABILIDAD

Carga responsabilidad por yuda bo yiu sinti su mes balioso. Y lo siñ'e pa ta parti di un ekipo. Duna tarea cu ta cuadra cu edad di bo yiu.



SEA CAUTELOSO CU CRITICA


Splica bon cual comportacion bo ta spera di bo yiu. Pero no reacciona di mas si bo yiu no ta amabel. Corda cu tur mucha ta haci fout. Splik'e na un manera tranquil kico el'a haci robes.

E manera con abo ta trata bo yiu, ta influencia e manera con e ta trata otro hende.

BO TA UN EHEMPEL IMPORTANTE PA BO YIU

ACTUA CU AMABILIDAD

Bo yiu ta siña door di mirabo. Mostra bo yiu con bo kier pa e comporta su mes. Sea honesto cu bo yiu si bo ta poco amabel of si bo no actua segun bo balornan.



PAPIA RIBA E BENEFICIONAN DI TA AMABEL.



Splica cu trata otro cu amabilidad por yuda tur hende anda mihor cu otro. Y laga bo yiu sa con bon bo ta sinti ora cu bo yuda otro hende sin spera algo bek.



MUSTRA RIBA COMPORACION AMABEL

Por ehempel bo por:

- Mira television hunto. Mostra riba actornan cu ta actua amabel. Papia riba con e comportacion ey ta yuda otro.
- Lesa corant cu bo yiu. Mostra riba articulonan tocante hende comun cu ta actua cariñoso y sin egoismo. Papia riba con e personanan involvi mester a sinti.
- Motiva bo yiu pa lesa tocante hende famoso cu a actua cu amor y compasion pa otro. Puntra un bibliotecario pa sugeri algun buki riba e topico aki.



MUSTRA RIBA UN COMPORACION CU NO TA AMABEL

No ignora comportacion cu ta altera of cu no ta amabel na television, den noticia, etc. Papia riba con e comportacion aki ta haci otro hende daño.

SEA AMABEL CU ANIMALNAN

Mostra bo yiu cu tur criatura merece un trato amabel.



SIÑA BO YIU PA PENSA RIBA OTRO HENDE

Un mucha amabel ta purba comprende situacion y sentimento di otro hende.


IDENTIFICA SENTIMENTO

- Traha un lista di sentimento comun, p.e. rabia, alegria, soledad y tristeza. Laga bo yiu pinta cara cu ta cuadra cu e sentimentonan.
- Motiva bo yiu pa papia di su sentimentonan.



HACI BO YIU PREGUNTA

Puntra bo yiu pa pensa riba kico ta haci hende sinti bon y malo. Por ehempel,: "Con bo ta kere cu Suzy ta sinti ora muchanan ter'e pasobra e no por lesa bon?" Con bo ta kere cu Ryan ta sinti ora su amigonan ta apoy'e durante un wega?"



HUNGA WEGA DI ACTUA ("ROLLENSPEL")

Wega di actua na cas por yuda prepara bo yiu pa situacionnan dificil. Por ehempel, pretende cu bo ta yora pasobra un terdo a caba di horta bo placa di cumpra co'i come y a pushabo, benta abao. Laga bo yiu actua na un manera cu e por ponebo sinti mihor. Despues papia con cada un di bos a sinti.

COMPRONDE LIMITENAN DI BO YIU


Muchanan te cu 8 pa 9 aña tin problema pa hinca nan mes den zapato di otro. Purba splica bo yiu cu palabra cu e por comprende. Por ehempel, si bo yiu ta haci bofon di e manera con un otro mucha ta bisti, anto puntr'e: "Con bo lo sinti si un mucha haci bofon di bo pañanan?"



YUDA BO YIU RESPETA DIFERENCIANAN


NO IGNORA DIFERENCIANAN

Bo yiu por pensa cu nan ta malo. Papia honestamente riba diferencianan, na un manera cu bo yiu por comprende. Corda papia riba e similaridadnan tambe. Por ehempel, "Luis ta usa un rolstoel pa e por move y abo ta usa bo pianan. Pero boson tur dos ta gusta pinta y kleur.




SPLICA CON TERMENTO POR HACI DOLOR

Tin biaha mucha no ta comprende completamente con nan palabra y comportacion por afecta otro. Nan por kere cu si e otro no rabia of yora, e termento no ta haci dolor. Yuda bo yiu comprende e consecuencia di un comportacion no amabel. Splica cu por ta un persona lo no muestra locual e ta sinti paden.




MOTIVA BO YIU PA E TIN SU PROPIO OPINION

- Laga bo yiu sa cu no ta facil pa actua corecto tur ora.
- Elogia bo yiu ora e yuda un mucha cu ta rabia of tristo.
- Yuda bo yiu busca manera pa evita uni cu otronan cu ta ter of no ta amabel cu mucha den klas.



BUSCA SOLUCION CONHUNTAMENTE

Si bo yiu no ta amabel cu un hende, papia cun'e. Puntra bo yiu kico e lo por a haci di otro manera. Duna sugerencia.



Laga bo yiu sa cu amabilidad ta un muestra di fuerza no di debilidad!

MUSTRA BO YIU E PLACER DI COMPARTI

PAPIA DI HENDENAN MENOS AFORTUNA

Discuti e necesidadnan basico di e ser humano pa cuminda, proteccion y amabilidad. Papia riba con bo ta sinti ora bo ta den necesidad.



TRATA NA YUDA OTRO

Hunto bo por haci e mundo aki un mihor lugar. Bo por:

- Entrega comestibel na un bisña cu no por sali fo'i cas.
- Haci trabao boluntario na un fundraising.
- Haci donacion di co'i hunga na un instancia caritativo. Puntra bo yiu su idea con pa yuda.




BISA DANKI

Yuda bo yiu busca manera pa mostra su aprecio pa regalo y gestonan bunita. Por ehempel, bo yiu por skirbi su juffrouw un carta pa gradici'e pa su ayudo.



MUSTRA CU BO TA CONTENTO CU EXITO DI OTRO

Amabilidad kier meen ta contento pa otro, sin sinti envidia y sin spera algo bek. Felicita un hende cu su exito y suerte. Motiva bo yiu pa haci mescos.



CONSOLA OTRO DEN MOMENTONAN DIFICIL

Amabilidad kier meen ofrece apoyo den tempo bon y den tempo malo. Yuda bo yiu bin cu ideanan con pa cera amistad cu un mucha nobo den su klas of con pa anima un amigo cu ta malo.



YUDA BO YIU SIÑA ANDA CU OTRO HENDE

Mucha tin biaha ta pensa egoista. Nan por tin dificultad pa parti y comparti cu otro. Motiva bo yiu pa desaroya su abilidadnan social door di hunga cu otro mucha. Purba hunga wega di mesa y otro wega cu ta involvi duna beurt na otro.



COMUNICACION TA CONTA

Yuda bo yiu siña expresa pensamiento y sentimento na un manera cariñoso y amabel. Siña bo yiu pa:

SEA CORTES

Bon manera ta bon pa tur hende! Yuda bo yiu siña bisa “por favor,” “danki”, “despensami,” etc.

EXPRESA RABIA NA UN MANERA SANO


Motiva bo yiu pa expresa locual e ta sinti, usando e palabra “ami.” Bo yiu mester sa cu ta OK pa rabia. Pero cu nunca ta OK pa haci otro hende dolor.

SOLUCIONA CONFLICTO PACIFICAMENTE

Splica cu tur desacuerdo tin dos banda. Siña bo yiu busca solucionnan aceptabel pa tur dos banda.

PIDI DISCULPA

Un “despensa” sincero kier meen cu bo yiu a reconoce cu su comportacion a haci un otro hende dolor.



Pues . . .

YUDA BO YIU PA E TA AMABEL CU TUR HENDE, TUR DIA!

